

四庫全書

集部

欽定四庫全書

文忠集卷一百二十六

歷官表奏五

宋 周必大 撰

淳熙八年

東宮賀年牋

周重端辰誕布始和之吉漢尊獻歲具嚴元會之儀
繫我儲明受茲帝祉中賀恭惟皇太子殿下重光映日前
曜拱辰玉佩朝春稽首未央之殿珽輪扈蹕稱觴德壽

之宮惟慶賀之交修殆古今之鮮儷自協天人之祐永
同家國之休某叨預政機夙蒙恩遇府開天策常夢想
於英游苑立思賢尚阻陪於班謁其為頌詠曷罄敷陳
辭免劄子

臣準尚書省劄子四朝史志書成以臣經修奉聖旨特
轉一官者非常之恩承命惴恐臣竊以翰墨策勲固書
生之榮願必當其功乃或無愧而臣積緣幸會蚤被獎
擢二十年間四叨史職含毫閣筆翫愒歲時曾不能鋪

張列聖之德業參定信書之凡例移官累月方上奏篇
向非閨臺英彥悉心論纂則汗青之日未可期也臣得
免疇昔瘳職之戾為幸已多而何賞慶之敢望豈謂皇
帝陛下覆燾之仁有生者溥及雨露之澤近天者先濡
特令增秩以示眷寵雖功疑惟重賞寧過僭乃聖主厚
下之意然因人成事無功受祿概之古誼臣何敢安已
嘗面控忱詞茲用荐陳危懇伏望睿慈俯賜矜察明詔
攸司收還誤寵免至再三之瀆重干淵聽臣無任感激

惶懼俟命之至取進止

不允詔

勅某省所奏劄子辭免以四朝史志成書曾經修特
轉一官恩命事具悉朕緬惟神祖邁駿先猷惟時史
臣咸極妙選然方修而曾鞏遽釋其任既成而蘓頌
弗預於恩乃知名儒宗工宣勞載筆任而久而成
茲亦古昔之所難也卿高文大冊博識洽聞追迹二
臣固已有光向者四入承明咸典斯事網羅囊括用

力最多今釋簡冊登廟堂曾不淹久成書來上不其
榮乎答翰墨之成勞侈儒術之亨遇一階例進予猶
歉然遜避之章所毋庸至所辭宜不允

再辭表

臣某言伏蒙聖慈以臣辭免經修四朝史志轉一官恩
命特降詔書不允者奏牘上聞恐汗青之無補詔函中
錫愧情素之未伸敢憚牢辭冀回誤賞臣某 中謝 竊以
參聯近弼特異庶工職在彌縫既無日成月要之可考

思隆體貌又宣年除歲遷之是圖間因典策之修或陟
階勲之峻蓋疇久次且表殊知如臣者豫闕非才閱時
尚淺論新功則未效紀舊績則尤踈雖嘗執簡以搖毫
其寔濫巾而竊吹馬融三八東觀謾誇漢代之至榮知
幾屢為史臣莫就唐朝之大典值成書之進御沿故事
以申思反覆思之叨踰甚矣伏望皇帝陛下舜明察物
湯德懋官諒臣品秩浸高復難假名噐之寵念臣官曹
既曷豈應分鉛槧之勤濬發俞音趣收前令使朝廷之

上無貪榮僥倖之譏則海寓之間有識分興廉之俗無
共扶於公道寧專遂於私心臣無任祈天俟命激切屏
營之至謹奉表陳免以聞

批答

省表具之朕監於往昔咸重史臣觀厥成功率惟久
任張華尚誇於再至蔣又嘗越於十年當時推榮後
世稱美卿懿文華國雅望表民自窺典籍之藏逮聽
星辰之履咸專載筆遂究長才力倍羣英功先衆作

爰優班於恩典奚固執於謙規俾下多興庶識分之
風雖可嘉於卿志將國有各賞廢勞之舉亦殊失於
予心當即欽承毋庸重請所辭宜不允仍斷來章

謝轉官表

臣某言伏奉告命特轉一官加食邑寔封尋具辭免伏
蒙聖慈特降中使賜臣不允批答仍斷來章者述四朝
之史志夙愧瘵官升三品之文階今慙誤寵祗若絛綸
之下凜如淵谷之臨臣某

中謝

臣伏以爵秩之遷朝家

所重或赴功趨事內殫夙夜之勤或禦侮折衝外竭封疆之力於焉錫命斯謂陟明豈容尸素之人越晉高華之序如臣者奮繇詞藝久綴班聯既微汗馬之勞又匪屠龍之筆承明三入忝冒為多甘茂十官貪饗已甚逮茲拜賜殊以覲顏此蓋伏遇皇帝陛下天覆羣臣日新庶政功疑則厚弗矜虞舜之聰明賞信為先兼總漢宣之名寔寧使匹夫之僥倖不令一善之遺忘臣於斯時遂玷殊渥官崇祿厚未知稱塞之方恩重命輕惟誓捐

糜之報臣無任

謝太上皇帝表

臣某言伏奉告命以臣經修四朝史志特轉一官者充
位疑丞未宣廼力策勲翰墨又進厥官懇避無從叨踰
有覲臣某中謝臣伏以六十載貽謀之志億萬年傳信
之書屢易星霜甫成卷帙而臣昨在紹興之際嘗蒙上
聖之知以書林是正之官兼史氏編摩之職逮今二紀
被遇兩朝幸嘗秉筆以周旋敢覲終篇而尊奉晚陪機

政獲預榮觀賴儒先筆削之功在賞慶褒崇之數維茲
忝竊良以震驚此蓋伏遇光堯壽聖憲天體道性仁誠
德經武緯文太上皇帝陛下盛德脩躬至仁及物道包
衆有維蕩蕩以無偏天覆羣倫每恢恢而不失凡在會
生之類孰非受賜之人顧方高蹈於希夷何以仰酬於
造化臣敢不勉殫忠藎圖稱思榮居慙班范之才何裨
潤色幸際勲華之主請祝壽祺臣無任

謝東宮牋

某言伏奉告命以某經修四朝史志特轉一官者政塗竊位何補於大猷史局奏篇誤升於崇秩凌競拜命俯仰包羞某

中謝

惟四朝仁聖之相承有五紀設施之可

考禮樂刑政之畢舉堪輿夷夏之兼該分職設官在更張而不一整軍經武於制度以尤詳必能發揮既往之規模乃可昭示方來之準則允資鴻筆庸訖鉅編既閱歲以滋深宜成書之來上而某曩繇推擇嘗預討論正觀修書愧德棻之為首知幾司

闕

慙唐史之未成逮錫

賞於公朝例叨榮於寵數茲蓋伏遇皇太子殿下學探
聖域性廣仁端入奉慈顏方問安於有永出臨講肆每
進德於無疆俯鑒孤蹤久陪末屬借以庇存之賜致茲
優渥之恩青地深巖雖阻瞻於暉潤丹心激烈尚圖報
於知憐謹奉牋陳謝以聞

同趙相以下以霖雨待罪劄子

臣等仰惟陛下仁民愛物動合天心宜獲休徵以符聖
治乃連月以來罕遇晴霽致傷蠶麥今復霖雨過多秧

種將損皆是臣等調燮無術有干和氣苟或自恕人言謂何伏見仁宗朝慶厯春旱宰相陳執中參知政事宋庠丁度各降一官臣等恐勤宣押不敢居家待罪欲望聖慈稽用故事將臣等先賜貶秩然後罷黜庶幾天意回而咎徵銷少寬宵旰之慮臣等無任惶懼俟命之至取進止

不允詔

勅某省所奏劄子以霖雨過多乞先賜貶秩事具悉

屬者沴雨過常煥氣弗效惟政教之多闕致陰陽之
干和所賴邇臣交修庶治遽形咎謝未體朕心勉燮
序之令圖導善祥於不日副予厚望茂廼懿猷所乞
宜不允

再乞罷黜劄子

臣等昨以積雨未霽害於麥禾輒援本朝政事乞先賜
貶秩然後罷黜伏蒙聖慈矜存脩至詔諭恩勤臣等荷
戴隆私恨未有捐軀之路可報萬一惟是賞罰二柄理

難偏廢臣等誤叨簡擢服在近司平居則安享異數間
遇典禮又皆首被慶賞今者輔政無狀陰陽不調聖心
焦勞民庶咨怨瘝官之責將以諉誰容其自劾已是寬
典罰又弗加失刑甚矣何以弭災沴何以塞人言何以
勵庶工何以安厥位此臣等所以連章瀝懇不敢憚煩
瀆而遂已也伏望陛下赫然剛斷賜以黜幽既舉合於
大公自感召於和氣應天之實莫大於斯干犯威尊臣
無任激切俟命之至取進止

闕

旋華要越二

十年昨繇翰苑荐厯八座深惟踰分屢弓退閒陛下眷
留再三德意隆厚未知稱塞彌劇兢危旋冒選除進陪

二府恩私之重何啻丘山所願殫竭疲駑少效萬一而才分所局鞭策不前邦國大猷固非所任簿書細故亦復何裨晝度夜思憂慙罔措徒以叨聒四近稍繫觀瞻退處之間不容率爾素餐尸祿遂踰二年竊位妨賢罪則多矣加以年衰氣索百病交攻頭目眩昏腰足酸楚半月前又因飲冷暴下一伏時方止緣此愈覺疲憊不能支吾福過灾生理想如此當陛下厲精之日豈臣子懷安之時其如疾恙侵陵於心寔不遑處躊躇累日冒

昧以言伏望聖度優容皇明委照念其侍奉之最久矜其膂力之驟愆許解政機俾歸田里重任既釋憂心自寬庶以餘生永陶聖化捐軀殉國期在異時冒瀆威尊

臣無任云云

奉御寶批
降詔不允

不允詔

勅某云云具悉廊廟近臣朕所與朝夕圖回以儀天下之政者也豈可以歲月久近議進退哉卿極德淵虛蹈道時敏登朝應務細鉅必為宣翼之勤克厭朕

志底書求去覽觀慙然古者大臣皆務其方以敦其節則羣臣莫敢不正身修行以稱大體朕所嘉賴人具爾瞻往宅厥常益顯無窮之聞所請宜不允

乞罷政表

二十七日

臣某言伏蒙聖慈以臣乞解罷機政特降詔書不允者晉叨三接久冒處於高華退止一辭合亟投於閒散恭承溫詔尚閔俞音感已極於肺肝情荐殫於悃悞臣某中謝伏念臣奮繇孤遠親際聖明以鉛槧腐儒而居侍

從之聯以斗筭小器而脩疑丞之列心固知其冒昧人
共指其僥踰矧睿德之日新舉臣工而風動凡服采班
行之內競赴事功豈參華廊廟之間乃令尸素頻年惴
惴竊位容容上負九重之知下貽多士之誚積茲愧靦
成此病衰晝眩瞶以廢殮夜怔忡而忘寢足弱弗良於
趨走腰頑殆困於屈伸雖欲強顏若為陳力用仰干於
旒宸祈退返於田間而天語鼎來篤眷留之意王人狎
至全體貌之思夫何極陋之姿有此殊常之寵苟能加

勉安敢執迷顧念所居之官誠非自恕之地若坐滿西
曹之謫恐難逃東市之誅今雖似為於身謀寔亦稍存
於國體伏望皇帝陛下廣乾坤之量推父母之慈念臣
遭遇於初元許臣保全其晚節及公言之未至諒素志
之無它聽解政機俾安愚分循名責寔已慚無補於聖
時觀過知仁猶冀不妨於賢路輸誠采切從欲是期臣
無任

不允詔

勅某云云具悉卿精誠造微懿文合雅久服淵雲之
侍從進揚魏邴之謀謨正資儒者之在朝難託謙文
而避位其承素倚宜弭來封所請宜不允不得再有
陳請

乞通進司收接文字奏

右臣近緣陳解罷機政蒙聖恩指揮通進司不得收接
文字今來仰體聖意已供職訖合有謝札緣未奉聖旨
有司未敢通進欲望聖慈特賜處分便令進入謹錄奏

聞伏候勅旨

賜生日詔書

勅某秋物澄煒陰躔對望惟鈞途之俊哲降神嶽之粹靈特腆牢頒俾延家祉今賜卿云云

謝表

臣某言伏奉詔書以臣生日特降中使賜臣羊酒米麪者獻名州史永慨餘生拜賜家庭增光末路屬饗雖幸浮食知慙臣某中謝伏念臣拔起窮閭過尸榮祿糟醕

是醉敢妄意於天漿藜苒充腸猥參和於鼎餽矧年飢
用不足之際豈食飽居求安之時乃因載育之辰更冒
分甘之寵伏遇皇帝陛下仁均覆燾恩厚臣鄰每因儀
物以示誠豈為庸駑而廢禮申以光華之使賁之溫厚
之言式示隆私寧專故寔貪於飲食懼饕餮之干誅俾
爾壽臧愧哉炮之均福誓殫忠藎圖報眷憐臣無任

乞序位李彥穎下劄子

七月

臣嘗考國朝故事侍從而上或遇舊人再入其序位多

在見任人之上非獨朝廷之體亦以興廉遜之風伏見
參知政事李彥穎數年前已位二府今者再入臣合在
下理無可疑伏望睿慈特降處分以憑遵守今取進止

第二劄子

八月

臣適具奏乞序位李彥穎之下緣欲降付三省未敢盡
述底蘊伏見熙寧三年文彥博以舊相為樞密使陳升
之初拜宰相神宗用天聖故事特令升之仍位彥博之
下雖王安石力阻彥博收回成命然詔書具在聖意高

遠非安石所能知也夫宰相樞密使位序有差國朝尚且迭為先後況同是參貳班列一等謂如元豐以後同知樞密院尚書左右丞或互有除改則位次不易其來久矣臣之末至自應在彥穎先進之下尚復何疑至於侍從之類其例尤多慶厯五年楊察再知制誥同僚張方平等上言察係再入請班居上有旨從之紹興以來猶有用此例者若是偶未思索或不暇檢閱典故猶可襲常蹈故臣既心知其然倘不自列則欺罔之罪大矣

臣竊恐來日立班相妨本欲權免朝參一日又慮外議不知此意妄有傳說遂復不敢欲望聖慈宣諭閣門許臣班彥穎之下庶幾於義稍安臣素蒙陛下恩憐乃敢殫竭惓惓伏取進止

辭免知樞密院事劄子 八月

臣伏蒙聖慈除臣知樞密院事特降中使宣押赴院治事者臣聞命震惶罔知所措臣竊以西樞分職兵柄在焉本朝雖委用儒臣亦須有文武才畧識華戎事體且

望寔素為中外所信服者然後舉而用之乃能仰副注
倚俯協公議如臣不肖論迂而性拙徒以章句之學久
被簡知服在論思已為忝冒驟參機政彌愧超踰敢意
誤恩進籌帷雖陛下聖謨獨運神武布昭執事之臣
不過稟訓飭於上行文書於下縱殫薄技難企清光而
官匪其人國家奚賴才不稱位有衆何觀祇竭忱誠仰
祈鴻造冀回渙渥改授英才俾仍舊班免貽非據之誚
其為榮幸殆與進擢均矣干冒宸扆臣無任

不允詔

勅某省所奏劄子辭免除知樞密院事恩命事具悉
朕惟以儒臣本兵權以毅將庀武守惟國家之長御
若臂指之相維卿學洞本原察含永鑑躬公綽之不
欲邁壺遂之深衷清德藹聞遠猷彌劬擢繇政席晉
長機庭資沈心善照之謀濟厭難折衝之效是惟次
陟母事冲辭所辭宜不允

辭免知樞密院事表

臣某言伏蒙聖慈以臣辭免新除知樞密院事恩命特降詔書不允者左轄瘵官宜首加於幽黜右樞分職敢遽冒於顯除雖尺一之頒理不可違然再三之瀆誠亦難已臣某中謝臣竊以本兵地要率屬選高觀累朝之求賢暨明王之籲俊或取其久更帥閫遂圖任而弗疑或為其嘗貳機庭越進遷而示寵故望以徊翔而加重智因練歷而愈明試可若斯僉諧必矣惟臣之戇無一而宜所窺者率皆古昔之陳篇所供者不過簿書之常

守心豈識軍戎之要足未趨宥密之嚴方二柄之臚分
乃一朝而躡進聖神在上若為參前箸之籌哲人滿朝
徒使愧後薪之積苟不力祈於避免殆將立抵於譴訶
伏望皇帝陛下以稽古之聰明鑒用人之得失收還誤
渥改授寔能天祐高皇必有子房之決勝人歸宣后寧
無吉甫之憲邦罔俾愚臣或妨賢路臣無任云云

奉御寶批

降批答不允
仍斷來章

批答

熊克撰

省表具之朕獨總萬機分幹二柄冢司不兼武事有
慶厯續定之規宥府不帶使名有元豐肇正之典參
舉故事序升弼臣卿寬裕而有容開明而無滯道能
方古在臯陶稷契之間文可作經出太史莊騷之上
早徧儀於華要久預贊於幾微晉典事樞蓋協時論
何讓詞之確守乃需奏之上陳其亟祇承毋庸抗避
所辭宜不允仍斷來章

口宣

有勅卿久陪天綽進典神機顧渙號之已孚況師虞
之允穆亟其祇命勿尚固辭今差某人賜卿不允斷
來章批答想宜知悉

謝表

臣某言伏奉告命授臣知樞密院事尋具辭免伏蒙聖
慈特降中使賜臣不允批答仍斷來章者造化陶鈞之
上天啓聖謨折衝樽俎之間人需賢德孰云庸懦堪此
選除望帷幄以徬徨拜絲綸而懷慄臣某中謝臣聞兵

布於外是為爪牙權歸於中寔寄心腹上下有相維之
勢古今存不易之規廟勝所關才難為甚如臣者駑駘
步窘培塿形卑初非致遠之才敢起升高之念而遭逢
華旦忝竊殊知廿載神畿徧厯清華之地十年禁橐遂
參輔拂之聯戴恩奚啻於丘山論報未施於涓滴所期
汰免何意褒遷越繇黃闥之嚴升踐紱樞之峻惟乃聖
乃神之真主方高出於百王豈不文不武之具臣可迭
居於二府懇辭弗獲祇受為慙茲盖伏遇皇帝陛下政

急內修策先自治宅中圖大既隆道德之闕威詰禁軍
不廢甲兵之問姑緣人乏猥用臣愚臣敢不激勵壯心
贊襄先務外攘夷狄願觀復古之勲載戢干戈尚覲垂
衣之化臣無任

謝太上皇帝表

臣某言伏奉告命授臣知樞密院事者東西置府對分
軍國之權左右惟人協贊鈞樞之運猥容迭處良愧超
遷臣某

中謝

竊惟宥密之司安危所寄議論近陪於帷

幄機緘迎解於疆陲以充國之老臣尚艱踰度如魯人之肉食何有遠謀自非求儒術之真安得制廟謀之勝如臣者起家一第隨牒四方踈慵微稽古之勤昏鈍乏過人之畧荷兩朝之見噐偕多士以在廷金馬玉堂既久司於文翰鸞臺鳳閣遂參穆於政機豈才名烜赫之當然由歲月推移而至此曠職方期於簿責本兵更誤於詔除借箸而籌何以仰符於上意假人以噐居然恐累於宸恩俯俸拜嘉忸怩就列茲蓋伏遇光堯壽聖憲

天體道性仁誠德經武緯文太上皇帝陛下冠冕百王而弗居其聖堪輿萬物而不有其功無疆惟休坐銷金鎔之氣必得其壽永享玉卮之歡謂時清非假於弼諧故質朽亦容於承攝臣敢不兢兢夙夜勉勉幾微遠至邇安何取良平之策天長地久但祈堯舜之年臣無任

謝東宮牋

某言伏奉告命授某知樞密院事者三年預政難逃指目之譏再命本兵益峻股肱之列已伏龍墀而叙感重

瞻鶴禁以知歸臣某中謝伏念臣才不逮人性尤忤物

適有天幸獨蒙上知靡更州縣簿書之勞即居臺省文
字之職昨仰親於三善嘗坐閱於六幕始終獎予之殊
前後遷除之數華門圭竇方襍被以弓歸黃閣紫樞乃
牽縈而徧厯深惟負乘如履淵冰茲蓋伏遇皇太子殿
下天縱聰明日新德業取士斂才之切蓋根本於誠心
問安侍膳之餘每推揚於善類致茲新渥及乃舊人某
敢不思勵壯圖期酬夙眷信而好古雖莫陪東序之英

游從曰撫軍尚獲贊北征之盛舉謹奉牋稱謝以聞

謝明堂加恩表

臣某言伏奉告命以明堂大禮加臣食邑五百戶食寔封三百戶者宗祀告成一人能事湛恩敷錫四表惟心曾是具臣亦叨徽數臣某

中謝

恭惟皇帝陛下事親以

孝撫民以仁無一念不存乎誠無一事不協於極宵衣旰食允克勤公聽並觀濟之好問凡舜禹之德業固皆優為如漢唐之規模殆不足進水旱既弭陰陽自調


躋民壽域之中偃革邊亭之外方且聖弗居聖新而又
新思歸功於兩儀用嚴配乎二后乃稽三歲之制乃盛
九筵之儀內殫一純外脩庶物謁款道祖裸將太宮齋
明極其精專拜跪忘其勞勩熙事咸脩諸祥畢臻上焉
歸胙於庭幃下以均釐於普率善無小大賚予則同罪
無舊新滌除則徧可謂古今之壯觀聖哲之成能而臣
初乏禮官司存之勞又匪方伯職來之助猥預右樞之
數僅參前導之聯而乃拜噐幣於尚方耗金繒於外府

僥踰已甚愧汗靡任茲仍徹於多田益增光於在列曾
微千一之慮獨冒再三之榮歎太史之滯留彼奚不遇
錫康侯之蕃庶臣則何庸惟誓捐軀少圖報國臣無任

乞與王嘉賓換闕劄子

伏念臣妻之兄從政郎王嘉賓昨於淳熙五年內授封
椿庫監門待闕已及五年今夏當赴緣臣任參知政事
慮有妨嫌即曾奏知乞令回避伏蒙聖慈宣諭左丞相
准擇闕對換繼與一般軍器所監門保義郎李侯兩易

訖尋蒙恩脩數西府其軍器所雖屬御前却是樞密院
使闕緣此本人奉親挈累徘徊累月以臣之故又復不
敢交割在臣合與陳述伏乞降付三省施行輕瀆宸嚴
臣無任



文忠集卷一百二十六

欽定四庫全書

集部

文忠集卷一百

二十七至
三十

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣蔣繼煥

欽定四庫全書

文忠集卷一百二十七

歷官表奏六

宋 周必大 撰

淳熙十年

同施樞密以旱災乞罷黜劄子

七月

臣等仰惟陛下勵精庶政惠愛元元其于歲之豐歉無
一日不軫宸慮此固中外所共聞臣等所親見也今者
夏秋之際時雨偶愆聖躬焦勞天語惻怛修己之誠靡

不盡恤下之政靡不舉祈禳之典靡不行宜格天休上
副德意而膏屯未博衆情嗷嗷臣等並典相機號為執
政軍國庶務參裁其間既無以協贊脩禳又不能交舉
職業積此謬戾遂干至和雖欲逃刑何以文過願加顯
黜不警曠療庶銷旱祥可必豐歲臣等謹已出郊待罪
伏乞睿斷即賜施行臣等無任慚懼俟命之至取進止

七月十三日奉御
寶批降詔不允

不允詔

勅周某等省所奏劄子為夏秋之際時雨偶愆乞加
顯黜事具悉蓋聞天人惟精禋之交災異緣政教而
起朕德不類亢陽錯度省躬思咎寤寐增嘆卿等擁
樞贊微惟以共御厥罰消弭未形者宜雅知之方務
交脩圖應天之寔引咎避位豈朕所期祇竭大忠孚
臻休應所辭宜不允

同二府乞罷黜劄子

特進左丞相冀國公臣王淮宣奉大夫右丞相儀國公

臣梁克家通奉大夫知樞密院事臣周某某端明殿學士
朝請大夫簽書樞密院事兼權參知政事臣施師點劄
子奏臣等茲以變理無狀時雨不應上章自劾待命津
亭伏蒙聖恩各遣中使宣押歸第臣等迪于威命不敢
固違屏息家居恭俟嚴譴豈容偃然復入都堂治事欲
望睿慈速降處分大正典刑既協輿言必符天意臣等
無任

不允詔

勅王某等省所再上奏劄子以變理無狀時雨不應
乞大正典刑事具悉昔成湯桑林之禱以六事而責
躬宣王雲漢之災矜百姓而修行蓋君人克已而上
注則天道隸忱而聽卑固難飾應變之文始欲歸有
司之責卿等選於羣獻式是百僚靡勤不宣何以致
常暘之咎繇朕不德無以厭上帝之心所以避正寧
而損缺訪羣言而緝政庶勵精而致改用因異而邁
休苟推過於弼臣是忘祗於天戒其思交儆贊翼翼

之機猷尚格至和達疊疊之歡樂勉圖嘉績宜弭來
封所請宜不允不得再有陳請

旱災乞黜表

臣某等言近以雨澤愆期兩具奏乞賜罷黜伏蒙聖恩
疊頒詔諭所請宜不允不得再有陳請者伏以亢陽為
沴上軫宸心豫政非才下喧物論既積難安之愧敢稽
自劾之章仰溫詔之曲留俯危衷而載惕臣某等中謝
臣聞雲漢之歌宣后撥亂所以去灾春秋之紀衛侯興

師從而致雨足驗歲年之豐歉實闕兵政之否臧今臣等猥以斗筭參于帷幄圖事經遠有愧良平之腹心慙威折衝未還文武之境土以此鬱中外之望宜其干陰陽之和雲上於天至輟九重之宴樂月離于畢尚遲四野之霽霓僉歸咎于具臣合自拘於司寇伏望皇帝陛下賞誅順帝視聽從民察樸樸之亡堪本難近用念蘊隆之為念當責邇僚或稍貸於斧斤姑斥還于田里雷霆之怒以震耀而不私霖雨其滋尚昭蘓之可必臣等

無任

再乞黜劄子

臣等竊惟聖心閔雨甚至農夫望歲至切而常暘為沴
天意未回臣等雖蒙聖恩少緩誅斥再勤勅使疊下詔
函而震灼憂慙實難安職除已再上表陳乞外所有十
六日以後立班奏事臣等不敢趲赴伏乞睿斷早賜罷
絀施行取進止

御劄不允

比以亢陽為沴時雨弗滋咎應之來其必有自乃貶
食退次求言念愆思有以答天之戒所賴二府輔弼
之良交倣不逮以導迎善氣而列章求去却而復上
至於再三朕何望焉其安厥位益陳乃謀銷弭災變
以副仰成之意故茲詔示想宜知悉

奏謝劄子

臣等伏為雨澤愆期再上表乞賜罷免特蒙聖恩寵錫
宸翰粲然盈幅莫非禹湯罪已之言臣等相與誦歎震

懼無地昔漢世每有災異必切責丞相御史本朝故事亦以是降黜大臣今陛下則不然貶食退次詢求直言凡可責躬答天戒者無一不用其至獨於臣等則百方覆護屈撓常憲雖父母愛憐不肖之子亦恐未能寬恕如此臣等自當碎首捐軀圖報萬一惟是才術駑下謨謀淺拙終慮無所施設以少副陛下仰成之意尚容來日俯伏軒陛控叙危悰謹先具劄子奏謝伏乞睿照

預辭生日牲餼奏

臣伏見陛下以雨澤尚愆避殿減膳形於詔旨臣備位西府方自劾失職席藁俟命竊慮有司以臣生日在近例降中使匪頒牲餼臣實不敢祇受欲望聖慈預令寢免少安危懼取進止

御批

還政引災已難徇請續齡錫慶何必預辭

生日詔

勅某任隆樞載望映時宗屬金德之乘秋儲崧靈而

協吉特頒康錫庸示注懷今賜卿云云

謝表

臣某言伏奉詔書以臣生日特降中使賜臣羊酒米麪者門設之弧日切劬勞之念庭瞻爾特時豐燕飲之頒歎親養之無從拜君恩而有覲臣某中謝伏念臣丁年孤露晚歲遭逢揆初度以興憐羨久生而奚益一自叨陪二府坐閱四期淺識寡聞詎堪於設醴素餐尸祿徒負於加籩矧當貶食之辰彌愧養賢之誼需章預控敬

仲體國之誠宸翰隨攸榮奉續齡之訓孰云異數猥及
微臣茲蓋伏遇皇帝陛下盛德矜愚深仁厚下謂昔選
掄之已誤豈今禮遇之或忘紫渙敷言異其嗟之路食
黃封列缶灑可浥之天漿竊自省循若為報塞臣敢不
仰銜鴻施俯厲孤衷愛之欲其生固難酬天地之造食
焉急其事寧不畏鬼神之誅惟誓糜捐少逃訶譴臣無
任

為二兄乞再任宮祠劄子

臣輒有私誠上千宸聽臣有堂兄奉議郎必端見係第二任知縣資序昨授宮祠今年三月任滿欲赴部注擬間偶值長兄朝請郎必達事故孤幼無人照管緣此不能前來坐食已八九月未免仰祿欲望聖慈特降睿旨再差宮觀一任冒瀆天威臣無任戰汗之至取進止

東宮賀冬牋

子為天統占書先十二之辰日軌翼維化國測丈三之景既兩宮之受祉宜二極之同休中賀恭惟皇太子殿

下仁孝中涵英明外著進德遠超於啟誦承顏並事於
勛華當令序之踐長知壽祺之增永某叨塵右府密企
東儲阻邁跡於賓階第竭誠於慶牘臣無任

太上皇后慶壽賀東宮劄子

某等仰惟主上恢崇聖治祇奉親歡昨以郊年嘗舉光
堯之慶禮今逢春日併陳文母之盛儀萬壽無疆四方
來賀殿下以天孫之愛儲極之賢適趨金殿之朝遂助
玉卮之奉邦家攸賴簡冊增光某等不獲躬詣宮庭謹

具劄子申賀伏乞令照

淳熙十一年

辭免樞密使劄子

六月

臣伏蒙聖慈除臣樞密使仍降中使宣押赴院治事者
恩渥殊常震惶失措臣竊觀本朝故事機庭置長或使
或知蓋因人才之優劣別資望之重輕元豐肇新官制
始刊使名雖有聖諭實惜之也自是四十餘年莫之或
改建炎紹興間二揆嘗司兵柄不過曰兼知院事而已

尋因舊相召還復令充使以示優禮其後或勛舊官至公孤或忠賢名重帷幄間有除授而非積歲月之勞所能至也如臣疲輒不任職庸瑣非遠品五年政路毫釐無補見朝士則顏面外覲聽輿議則心神內悸豈獨臣自知之固亦難逃衆目今乃以至劣之才而當至優之禮以至輕之望而尸至重之任此而弗懼可謂愚人伏惟皇帝陛下照臨有赫必能察臣之惓惓覆載無私不可假臣以名器始仍舊次亟格新綸天佑聖君自生豪

傑隆名異數願少須之冒貢忱詞期於得請云云

不允詔

勅某云云具悉東西二府分掌政枋宥密之地體均
輔廷朕儀圖真儒進筦丕務疇其美績俾正使名所
以崇本兵隆國勢也卿以淵源宏奧之學濟魁壘光
明之資折衝制勝謀於未形德威隱然允契羣望朕
嘉賴焉乃申明陟特峻事權帷幄之籌實用增重茲
惟天下之公與朝廷所倚以尊安者卿烏得而辭乎

往其欽承以若予采所辭宜不允

辭免樞密使表

臣伏蒙聖慈以臣辭免樞密使恩命特降詔書不允者
掌武升華具言不稱摛文有爛申戒弗俞既分義之難
安在黷煩而敢避臣其中謝竊以百僚序進俱俟有功
四輔驟遷寧容無說雖位不可虛者尚當弄印則官不
必備者焉用空餐矧今機宥之權自昔腹心之地陛下
有武王之德而臣非閔散之才有高祖之明而臣乏良

平之畫不過疲精於簿書之內安能陳力於廊廟之中
徒以久被厚恩未伸薄技身已病而不敢言去智已殫
而靡容自休白首摧頽懷壯圖而惕若丹心激烈思來
效以茫然幸顯黜之偶寬何明揚之輒冀俟聞殊渥良
震危衷惜欲冒居將如公議伏望皇帝陛下睿聰委鑒
聖慮周思念其所居者何官而其所付者何事既已誤
加於甄錄詎宜復假以使名收乎號於夫揚免煩言之
嘖有為臣不易方當俯念於興邦惟帝其難毋或上虧

於能哲臣無任

批答

省表具之五兵之運總於機庭七德之經本於儒術
若時宥密之任實倚峻賢之圖卿名世瓌才經邦茂
業踐脩端直識詣高閎超自疑丞進司樞要夙宵匪
懈中外以寧朕方攬髦傑以建治功勅時幾而集休
命疇咨俊望顯有成勞爰陟使端之崇益觀廟筭之
勝所資翼亮懋建於殊勲奚務冲撓更伸於遜牘亟

祇渥庸體眷懷所辭宜不允

辭免樞密第二表

臣伏蒙聖慈以臣再上表辭免新除樞密使恩命特降中使賜臣批荅不允者囊封上達懇還右府之隆名綈詔中頒勅遣左璫之信使耳方傾於報可心乃愧於往諧敢躋厚以終辭期聽卑而遂允臣某中謝竊以朝分二柄任屬四隣雖文武並用常欲適平然軍國異容固難代匱苟其人之未稱寧厥位之或虛如臣者資本腐儒

生逢昭代誤簡優隆之眷久叨清切之除以討論今古
為官常以綴緝詞章為事業自惟淺陋豈嘗軍旅之聞
何意選掄亦預甲兵之問一陪籌幄再易歲陰駕御英
雄仰淵謨之莫測經營宇宙知獨斷之有餘姑令省閱
於文書且俾奉行於詔旨叨踰己甚獎擢何居不量才
力之難堪直冒寵光而弗避是惟既患於得失豈復能
為於有無況今爵秩已崇事權已重若可致秋毫之補
自當殫辰告之猷奚以進遷速其顛沛伏望皇帝陛下

灼知情偽熟察智愚謂將將得於天資儲精既久念賢
賢繫乎國體注意尤先勿使具臣更汙茂典令惟行而
弗反固干方命之誅民所欲而必從迄賴曲成之造云
云

批答

省表具之國家建右府以摠戎昭命儒臣而崇使領
蓋自太平興國以來成憲具在迄於今茲必以宏才
碩學見聞殫洽者任之豈非兼文武之用明政事之

體乎卿博通古今德茂先覺發為謀謨足以斷國論
措諸事業足以恢政經夙被簡知延登樞近遠猶碩
畫宏益居多乃疇已試之庸申峻久虛之號蓋將資
精神之運懋勛烈之隆使四夷咸賓萬邦底乂茲為
美報安事固辭其止謙勞亟從俞往所辭宜不允仍
斷來章

謝表

臣某言伏奉制命授臣樞密使加食邑一千戶食實封

四百戶累具辭免伏蒙聖慈特降中使賜臣批答不允
仍斷來章者職參兵柄久愧罔功恩陟使權益慙非據
大矣雲天之施慄乎淵谷之臨臣某中謝臣審觀聖朝
之規模備知軍制之嚴密宿勁師於諸衛內有本強之
威列戍卒於三垂外無尾大之患以致某分州鎮星布
將兵衆寡得以相維遐邇期於克乂雖韜畧倚之虎士
而機權歸之柄臣故擇真才使當重任粵從南渡居念
北征扈行闕之衆不減於承平屯諸鎮之師又增於往

昔間有和戎之利實非偃伯之時費益加多用常不足
歲殆更於五紀人咸徯於中興然而宿將消磨每艱於
選授後生雜還罕歷於戰攻勤勤旰仄之咨切切恢規
之志允資廟筭協暢天聲臣於斯時猥備近列之尋常
之績效幸千一之遭逢以股肱而康未殫忠力用腹心
之傑敢冒寵榮當明制之誕頒疊遜函而丐免莫回成
渙祇奉鴻恩茲蓋伏遇皇帝陛下德紹祖宗量包夷夏
臣其莫及自廣運於聖神人不備求務蕪容於巧拙遂

令孱瑣頻玷超除臣敢不勉勵衰殘少圖稱塞舞干來
遠素知文德之敷歸馬告功尚見武成之作云云

謝太上皇帝表

臣某言伏奉制命授臣樞密使加食邑一千戶食寶封
四百戶者豫聞兵政無補萬分褒進使名有慚再命循
墻莫避履薄是虞臣某中謝伏念臣起自諸生早蒙異
眷儒宮藏室許邁跡於英躔史觀霜臺浸問津於要路
恩施丘山之重事功銖兩之輕荏苒華年浸尋皓首父

堯子舜幸逢千載之期左皋右夔馴點四鄰之列屬在
戢戈之旦莫施借箸之謀碌碌濟朝容容備位免大何
而已幸正近用以奚功非望所期滋榮實懼此蓋伏遇
尊號太上皇帝陛下德隆上聖運啟中興凡今經武以
整軍皆昔定功而保大聰明不殺人懷有截之威安樂
延年天畀無疆之壽致令尸素不失高華臣敢不展四
體以勤勞報兩朝之恩遇自瞻太極豈容品物之謝生
身在康衢徒助歌謠而歸美臣無任感恩荷聖激切屏

營之至

生日詔

勅某卿材宏廟棟任重天樞啟素商既望之辰舉嘉
誕匪頒之式庸昭寵遇益俾壽臧今賜卿云云

謝表

臣某言伏蒙聖慈以臣生日特降中使賜臣羊酒米麪
者祿養無從感蓬弧於私室恩頒有腆分牢醴於大官
貌是孤生愧茲異數臣其中謝伏念臣奮身寒苦息念

肥甘貧若顏回但慕簞瓢之樂道非伊尹敢思鼎俎之
干叨蒙神聖之知濫綴弼諧之列曾微一善可稱千鍾
逮逢初度之臨更冒多儀之錫詔音溫厚勅使光華嘗
羹悲遺母之言負米動為親之念隆私所被朽質奚堪
此蓋伏遇皇帝陛下眷厚近司禮嚴故實饗殮而治慮
心力之俱勞宴樂於需推正中而及下是豐賚予不勸
臣隣臣敢不祇拜君嘉勉圖忠報食天祿也富一醉而
則那由已飢之飽三軍而殆庶臣無任

賀東宮生辰劄子

某今者恭遇皇太子殿下誕序甫臨萬有千歲中外同
祝而況兩宮勅使交馳慶禮邦家盛事今古所稀某夙
蒙恩遇密瞻鶴禁隆文不獲與僚案展拜庭下野芹寓誠
盖循定例仰干威重罪何可逃伏乞令慈俯賜裁赦某
下情無任頌禱兢懼之至

東宮賀冬牋

統得於天亶謂三正之首陽生於地俶觀一氣之升喜

溢宮庭歡均海縣中賀恭惟皇太子殿下溫文內蘊英
敏外彰日奉重親謹寢門之常度教形長子嚴邸第之
新儀受福孔多與時偕永某密瞻玉彩阻奉瑤卮欣逢
有道之長倍切無疆之祝某無任激切頌詠之至

淳熙十二年

東宮賀年牋

天運無窮方衍萬年之歷聖圖有大載頒四海之春仰
淑問之嵯嵯知休祥之簡簡中賀恭惟皇太子殿下道

該周誦識邁漢莊贊育物之仁允資蒼震助麗天之照
丕赫少陽德已懋於日新福自臻於時萬某猥參丞弼
久荷恩私雖龍墀密望於儲暉而鶴禁阻修於慶禮瞻
依徒切頌詠奚殫

天申節滿散功德疏

奉萬歲之玉卮將修慶典獻千秋之金鑑適際誕期凡
在臣工敢稽美報假薰修於西竺致頌禱於南山尊號
太上皇帝德被含生位尊太極夙享寅威之福今延安

樂之年災運方興永對舒長之景薰風不斷常依長養之仁

乞令宰臣兼樞密使劄子

臣伏見仁宗皇帝慶歷二年秋晏殊為樞密使王貽永副之會西邊出師用諫官富弼之言詔宰相呂夷簡章得象並兼樞密使今北方情偽罔測正陛下經武整軍之時比之西邊事體尤重兼中興以後自有近例欲望聖明稽參故實命王淮梁克家兼摠樞務既合公論亦

協權宜臣累月來屢與施師點商量方敢奏稟如蒙許
允臣自當悉心竭力協贊萬一決不敢懷安避事仰辜
任使取進止

六月三十日批
出續聽處分

生日詔

勅某卿器資宏廓識慮淵通天生名世之英時賴保
邦之策方協期於西顙適告望於素舒載臨嘉誕之
辰宜舉匪頒之式今賜卿云云

謝表

臣某言伏蒙聖慈以臣生日特降中使賜臣羊酒米麪者蓼莪怙恃之勞俯臨載育伐木豆籩之踐深愧養賢拜賜周章捫心感歎臣某中謝臣竊以初度者常情之共記惟親安足以為榮多儀者明主之異恩惟德稱乃其無忝如臣孤露竊位高華旨甘不泊於平時尸素更嗟於暮齒逮膺蕃錫彌震危衷蓬矢桑弧久負四方之志竊肩卮酒曾何參乘之功茲蓋伏遇皇帝陛下恕以取人惠於接物既爵祿不嫌於誤與在餽牽奚吝於匪

頒有來外帑之珍俾作私庭之寵寵朝為壽悵無張酺
之歡上馬披堅徒勉廉頗之飯捐軀以報永世為期臣
無任

問聖體劄子

臣等累阻侍清光不勝犬馬之情雖聞聖體安和但雨
後天氣驟涼莫可更展一二日然後視朝否臣等欲二
十四日午後略就內殿起居伏取進止

東宮賀冬牋

冬廩因陳雲告屢豐之兆歲祥習吉天臨大報之期已
鍾慶於嚴宸宜集禧於儲禁中賀恭惟皇太子殿下五
闕德脩三善名彰奉亞獻於太宮聿嚴七帑登貳觴於
卯陞助格穹祗茂對一陽之來坐膺諸福之至某久陪
經席方侍籌帷雖莫預於進趨顧敢忘於祈向

郊祀禮成謝加食邑表

臣某言伏奉制命以郊祀大禮慶成加臣食邑一千戶
食實封四百戶者賚封於廟方予善人澤上於天亦揚

孚號顧何功於與祭乃冒寵於加田不敢獨辭惟慚虛
受臣某中謝伏念臣積緣幸會屢侍親祠超點崇班兩
陪於齋輅擢登樞筦再導於宸旒儒生之願已踰聖主
之恩曷報何期霈渥更忝徽章茲蓋伏遇皇帝陛下事
天寅恭待下仁恕嚴牲玉於大祀從周之文責酎金於
諸侯黜漢之陋故茲餽惠不必食功遂容尸素之臣例
被褒庸之典益之邛殿空慚書社之多歸我汶陽尚贊
版圖之復臣無任

謝太上皇帝表

臣某言云云拜況於郊甫畢祀天之禮施恩自近亟叨
加地之榮承命以還省躬而懼臣某中謝竊以宗祈盛
舉登配上儀本一人精享之誠來百職交脩之助如臣
無狀竊位有年徒能陪羽衛以往回且復導冕旒而陟
降粗逭不恭之譴初微可紀之勞何意宸綸益荒采邑
此蓋伏遇尊號太上皇帝陛下乾坤協德華夏歸仁勤
勞昔致於中興典則今貽於嗣聖上千萬歲之壽方歸

昨於慈庭同三千臣之心更均釐於黎獻致茲徽數畀爾具臣曲逆更封愧及陳平之戶泰元增策願祈漢帝之年云云

謝東宮牋

某言云云三歲習祥訖泰壇之大祀兆民賴慶均寰宇之多歡曾何補於運籌乃猥叨於加地某中謝伏念某夙蒙恩獎久預政機駿奔郊廟之間騎導車旗之內仰睿主親祠之盡禮暨元良亞裸之竭誠知列聖之來歆

致三靈之錫羨已深榮遇更冒徽章茲蓋伏遇皇太子
殿下主鬯凝猷重暉宣耀贊寬仁於君父厚體貌於臣
隣遂使空餐例增采邑漢儀既就初無待於叢綿吳地
益封竊有慙於滌洗某無任

免赴正旦入賀劄子

十二月三十日

臣所患腰疾連日用數醫調理尚未痊安來日元正啟
祚且復慶壽大典誼當勉強入賀正慮失儀謹具控陳
欲望聖慈預賜矜恕其餘謹俟面奏伏乞睿照

文忠集卷一百二十七

欽定四庫全書

文忠集卷一百二十八

歷官表奏七

宋 周必大 撰

淳熙十三年

賀正旦表

臣伏以三陽交泰萬宇俱春恭惟皇帝陛下德並照臨
仁參化育受四海之籍將混一於丕圖慶八帙之年益
恢隆於至養新又新而弗息朔復朔以無窮臣弼綴弼

諧偶緣假告阻趨北闕但祝南山臣無任

德壽宮慶壽赴不及劄子

臣伏值陛下謫稀世之濶典慶慈庭之萬壽凡一命而
上皆獲隨班入賀獨臣無狀驟感腰膂之疾不能起止
阻同百獸率舞彤墀之下其為悵恨深自憐憫謹具奏
知伏乞睿照

東宮賀正牋

舜歷誕頒方洽同文之化堯年並永載行慶壽之儀布

大喜於皇家集殊休於儲極中賀恭惟皇太子殿下中
和性稟英粹日躋我澤如春密致重離之助王明受福
適符交泰之辰對有叙之新祺協無疆之善頌某贊襄
何補暉潤焉依宮庭莫遂於膝行毫穎徒勤於頌禱無
任激切歸依之至

請假十日劄子

臣不善衛生腰痛日甚百藥俱試殊未有效欲望聖慈
給假十日庶幾一意將理獲遂痊平伏取進止

謝宣醫劄子

臣積為寒氣所薄有妨拜跪初誤信醫先投剛劑轉覺腰背疼重不能轉側仰蒙聖慈宣遣王懋診視宣通熨烙遂獲安愈再生之恩實踰天地臣昨日已曾奏謝伏緣王懋連日至臣私第取效甚速已依例薄送藥材之費欲望特降睿旨令懋收受臣無任感恩荷聖激切惶懼之至

謝賜藥方劄子

臣早來伏蒙聖恩矜臣病衰教以服餌之要茲復恭承聖旨賜到藥方二道便當脩製服食仰惟天地之至仁曲憐草芥之微命顧雖粉骨曷報鴻施臣無任

辭免慶壽轉官加恩劄子

臣準尚書省劄子節文二月八日三省同奉聖旨書冊文官周某轉行一官依例加恩臣恭承明命震懼無地臣聞國家爵賞之行蓋有二說非祿以詔功則予以馭幸過是而加焉斯無名矣邇者陛下竭事親之誠心增

太上之顯號制度裁於宸慮陟降勤於聖躬其在羣臣固亦何預若曰國有大慶恩繇近始實惟馭幸不必眈功其如宿衛之日已叨賜賚禮成之後疊拜金贈茲為予也多矣更加爵秩何以為名夫無名受賞雖踈遠之臣猶畏譏議況乃參陪四近繫中外之觀聽者乎伏望陛下照知忱誠愛惜名器及制命未下間許賜寢免是固國體所繫非獨安臣私誼而已干冒天威臣無任戰懼懇切之至伏取進止

不允詔

勅某云云具悉朕嘗歷觀前載博考舊聞求其寧親
介壽祉福兼修如今日之隆自三代以還未之有焉
蓋惟皇天右序我家太上克昭天德用申命於無疆
而二三執政之臣同寅協恭輔朕不逮兢兢翼翼仰
承閔休屬者皇筭增衍鴻名益崇寶冊揚輝昭登億
載卿以西樞之長毗予大政琬琰之刻藻翰是資乃
體法端偉焜燿彌文朕甚嘉之進秩陪封庶酬美績

顧惟丕慶誼不可辭所辭宜不允

辭轉官加恩表

臣某言伏蒙聖慈以臣書冊文轉行一官依例加恩尋具辭免伏奉詔書不允者慶賞驟加難於冒受溫言誕布諭以欽承心苟未安理宜自列臣某中謝臣竊窺國史深慕祥符詞章如陳堯叟之華問學如王欽若之懿冠班聯於西府製壇頌於東封俱服恩徽越升階秩既厚政途之禮抑增儒術之光顧臣匪才適爾充位方上

聖慶慈皇之壽即大庭陳玉冊之儀亘古罕聞崇朝創
見獲班朝而已幸叨錫命以何居況無昔人屬思之勞
敢用前日遷官之例是忘再瀆仰恩四聰伏望皇帝陛
下有赫照臨不私覆載上稽乾道念臣非撰述之官近
比淳熙許臣遂懇辭之志蓋公聽並觀之在此亦小庶
曲謹之當然倘明取予之方寧被黷煩之譴臣無任

批答

省表具之皇極之福有五蓋兼壽德之全天下之樂

者三實脩父母之養永惟國慶丕奉親歡申開綿遠
之期並舉雍容之典粵增光於寶冊實允賴於法書
不惟筆精墨妙而究勤於簡策之間抑亦武偃文修
而效美於謀謨之素宜頒寵數式懋賢庸閑休既軼
於前聞冲懇曷拘於近比無勞謙執亟服恩榮所辭
宜不允

辭轉官加恩第二表

臣某言伏蒙聖慈以臣再辭免書冊文轉行一官依例

加恩特降中使賜臣批荅不允者萬年受祜溥推有位之恩三命循墻度致益恭之懇渙雷風而荐至凜冰炭以交懷臣其中謝臣竊以褒陟文階增封書社厥惟異數以獎茂勛如臣者初乏事勞偶逢孝治當玉卮之稱壽暨寶冊之鴻垂既不能潤色討論上議郎之奏又無以鋪張揚厲賡儒館之歌徒因朝野之歡例備股肱之喜方將戒得敢復傷廉伏望皇帝陛下原省功疑屬精賞慶重馭臣之大柄輕遷令之小嫌倘容必預於邦榮

姑願稍陪於租食如是則邑辭多而受少尚希子雅之賢印趣刺而令銷彌顯高皇之聖陳情已至得請為期臣無任

批答

省表具之朕惟子愛其親必務顯揚之美名賓於寶更資後飾之文維時寶冊之書繫我鴻儒之筆簪紳頌嘆牒簡光華矧妙運於元樞實共圖於大政克遂寧親之養尤加輔德之勤既舉上儀盍頒茂賞諭言

已至懇避猶堅且將姑拜於爰租而復上還於文秩
雖禮遜固能於為國難廢至公若官邑均所以庇身
豈宜偏授其停奏牘母闕寵章所辭宜不允仍斷來
章

謝表

臣某言伏奉制命授臣正議大夫加食邑一千戶食實
封四百戶者得壽與名數錫寧親之祉進官及邑增褒
共政之臣雖竊幸于逢辰顧何庸而受寵臣某中謝臣

聞一人有慶賴及兆民萬壽無疆德加百姓蓋當懋隆
於愛敬則敷天咸被於榮懷臣夙冒殊知久聯邇列獲
值堯年之永益觀舜孝之新日轂身依照臨首暨霄根
勢近潤澤先霑已超寄祿之階更衍爰田之賦周章拜
命俯仰懷慙茲蓋伏遇皇帝陛下聖治通天仁心冠古
俾爾戢穀尚不間於羣黎猶吾股肱宜加憐於一體肆
假濡毫之技茂揚出綍之言臣敢不深念僬踰力圖報
塞德洋恩普難異衆以獨辭意廣才踈終悉心而自竭

臣無任

謝太上皇帝表

臣某言伏奉制命授臣正議大夫加食邑一千戶食實封四百戶者睿筭穹窿播鴻名於有永皇恩浹洽彰盛事於無窮何取駑才例叨僭賞臣其中謝臣竊觀自昔知名之士常恨罕逢極治之朝縱遭遇於休明或咨嗟於留滯而臣生當昭代仕歷要津紹興內禪之時綴官聯於烏府乾道推尊之日視詔草於鑾坡暨淳熙載舉

於慶儀以禁直獲聞於赦令茲忝樞機之職復容琬琰之書凡大典罔不與焉在微生亦云幸矣賀唐南內每慚韓愈之冠簪保魯東方更愧僖公之土宇寵光若此幸會何多茲蓋伏遇光堯壽聖憲天體道性天誠德經武緯文紹業興統明謨盛烈太上皇帝陛下道備勛華性宗黃老民以寧壹嘗一視於華夷身其康強將齊休於天地是推惠澤以及臣隣臣謹當深念僥踰力圖報塞四方來賀已先武士之班萬壽無疆敢後封人之祝

臣無任

謝東宮牋

某言伏奉制命授某正議大夫加食邑一千戶食實封
四百戶者堯仁得壽載衍於徽稱漢爵酬功猥加於最
品雖切逢辰之喜實深浮食之慚某中謝竊以萬乘而
奉庭闈十年而陳冊寶由聖主力崇於孝治肆皇天不
佑於我家粲盛曲之常行渺脩齡之未艾而某積緣幸
會獲際休明參華帷幄之間染翰瓊瑤之上已為榮遇

更冒恩章階升一等之崇戶斥四封之廣內循駕鈍難
副鴻私茲蓋伏遇皇太子殿下性篤愛欽學該禮樂推
事親之誠恪儼稱慶之威儀俯眷舊僚胥霑沛澤某敢
不益恭乃職思稱所蒙朝野多娛正洽三宮之樂子孫
逢吉永期五福之敷某無任

生日詔

勅某卿稟天間氣總國元樞方璧月之臨秋繁寶賢
之降嶽稽循賜式往介壽祺今賜卿云云

謝表

臣某言伏蒙聖慈以臣生日特降中使賜臣羊酒米麪者勞瘁初辰仰闕睿聽肥甘飫賜俯逮私庭恩重不貲感深無斁臣某中謝伏念臣稟生孤露逢運休明祿以榮親乃莫諧於終養廩惟稱事顧常愧於空餐久汙近司適因載育溫厚綸言之賜光華詔使之臨醪醴孔多餽牽有踐雖荷彌隆之眷實增弗洎之思茲蓋伏遇皇帝陛下恩結人心禮優士類飲食每歌於周雅割烹殊

異於湯臣施及庸才例頒寵數斯民仁壽幸未泯於餘
生既醉太平疇敢忘於美報臣無任

求祠第一劄子

九月

臣庸愚不肖誤膺簡拔久司宥密宜在黜幽特以大恩
未報不敢輕易言去比聞有人揭榜平江疏歐陽雋私
鑄沙毛錢則云恃臣鄉人言郭棣過失則謂臣嘗徇其
私請臣以匿名法不當問而所指之事於臣別無迹狀
遂置而不問但臣身脩四近望實素輕為人指名辱國

多矣今聞郭棣繳上件榜文申尚書省乞下有司究治
事既公行理難自默欲望聖慈許臣解罷密院職事處
以外祠庶幾他日根獲寫榜之人不至觀望鍛鍊各得
其平以示公朝不私之意伏取進止

第二劄子

臣充員政途閱歲滋久事功何有罪戾則多雖陛下天
覆海涵未置譴訶之域而臣內循非據常履永淵適已
具述懇誠乞一在外官祠差遣欲望聖慈即賜處分冒

瀆天威臣無任戰懼俟命之至取進止

不允詔 洪邁撰

勅某云云具悉樞機重任理實係於安危輔佐大臣
義難輕於進退卿周旋二府荏苒七年有庇民之大
德而持之以謙有事君之小心而濟之以正雅望宏
度已穆在庭之瞻忠言嘉謨尤高謀國之體方究觀
於績用何忽冀於燕閒匪我攸聞亟其反室所請宜
不允

第三劄子

臣昨日疊具奏劄乞奉外祠伏蒙聖慈遣使宣押未許其去仰銜恩施糜頂莫酬心既難安理宜固請伏念臣受才驚下百不如人而逢辰遇主徧歷華要承明三入又踰一紀向居侍從分量已盈求閒之章頻達睿聽暨參大政滋不遑寧但以去就繫人之觀瞻不敢如前之煩黷荐更歲律乃嘗陳情未奉俞音空慚尸素旋陪籌幄益愧超遷方俟再期力申前志忽蒙簡擢升正使名

弗獲寧辭黽勉就職今復二年有半矣爵位已極才力已殫在臣為當去邊鄙不聳盜賊不作在臣為無嫌尚或不知引退乃是前後故為背戾陛下縱加涵貸公論豈肯恕臣瀝懇籲天蓋亦晚矣伏望聖慈矜其惓款惠以初終推父母博愛之仁佚犬馬既窮之力速頒成命安此危衷取進止

不允詔

洪邁撰

勅某云云具悉朕禮遇元臣義均同體樞機周密監

其夙夜之勤輔贊彌縫遲以久長之報正爾有功之
可績詎容無故以言歸卿忠力一心將明兩地太尉
之尊等相物望既隆三公之任承君官儀允協方此
巖廊之恭已是資帷幄之運籌荐騰引去之章殊弗
仰承之意邊鄙不聳計見效以甚明膺力方剛在懷
安而未可體予申告母或嗣陳所請宜不允不得再
有陳請

東宮賀冬牋

雲兆三登瞻慶霄之紛郁日行道上符化國之舒長叢
瑞應於宮庭浹懽謠於海宇中賀恭惟皇太子殿下英
明毓質仁孝根心象著重輪助照臨於兩曜地居蒼震
贊簡易於二儀茂對陽剛備膺天祉某密瞻玉色阻奉
金觥敬逢七日之來虔致億年之祝

辭免進書減磨勘劄子

十二月五日同施
師點黃沼留正

臣等仰惟陛下愛惜名器以勸事功因臣僚乞裁進書
賞特軫聖慮斟酌區處內外大小咸得其當臣等蒙恩

各減四年磨勘許令回授天地之施草木知榮但臣等
昔雖備數掌故未嘗施鈇鑕之勞茲忝二府又非經進
自不應叨被賞典况提舉官既許辭避則臣等愈無冒
受之理今來更不敢循例控免仰勤詔諭輒同具奏劄
懇請欲望聖慈特依所乞庶伸體國之誼抑逃僥倖之
譏千黷宸扆伏深戰汗取進止

淳熙十四年

辭免右丞相劄子

二月

臣伏覩今月十五日制書授臣光祿大夫右丞相加食
邑實封特降中使宣押赴都堂治事者輔弼之任古今
所難猥加庸愚良以震駭臣聞棟以隆而吉鼎以中為
寶本末或撓安能任重剛柔中節乃可參和伏遇陛下
天縱聰明日新政治洞照羣臣之能否恢宏萬世之規
模宜得真賢助調元化顧如臣者夫豈其人徒以早侍
軒墀久陪帷幄奉承教令苟違譴訶揆席偶虛敢期冒
進今雖聖神獨運摠攬權綱並置疑丞間容充位然而

政省實具瞻之地宰司非次補之官必欲金諧固當選
衆倘謂綸言之已播輒沿故事而懇辭若昔仁皇登庸
次輔旋因物論改使樞庭當時貼麻人以為允伏望陛
下遠稽祖武博採公言毋以揚庭而難反汗俾仍舊次
適協前規免累聖主知人之明亦伸微臣量力之誼干
犯旒扆臣無任惶懼俟命之至取進止

不允詔

勅某云云具悉若昔帝王興起治功皆疇咨相臣協

謀同道故股肱良哉著於虞典左右惟人陳於商書
今並建輔弼兵圖政績次相之任顧豈虛授卿職典
元樞迄茲累歲經綸周密備宣賢勞爰正鼎司益恢
遠業宜體眷意務先同寅總理萬幾登於至治庶幾
乎帝王之佐撫章來上未諭朕懷亟其祇承勿用謙
執所辭宜不允

辭免右丞相劄子

臣性質駑下一無所長誤簡睿知冒居政治缺然補報

常負兢憂苟違謫訶已為大幸敢圖選擢進貳宰司以
樗櫟之材參棟梁之任將何以仰裨聖化振起治功聞
命以還震惶失措除已具奏辭免外適緣連值節假未
獲拜伏黼宸之側懇祈渙汗之回謹重以手劄控叙危
衷伏乞聖慈俯賜鑒照

東宮劄子

其庸駑不肖久塵政地毫髮無補日俟戾及敢謂聖恩
驟有褒陟俾聯揆席自非皇太子殿下眷念舊人曲加

荐進其何以臻此然力小任重實非所安已具奏懇免
欲望令慈因侍膳之間賜半言之助冀收渙汗安此危
衷冒瀆威尊某下情無任戰栗虔祈之至

辭右丞相表

臣某言伏蒙聖慈以臣辭免新授右丞相恩命特降詔
書不允者小才積累久陪廊肆之崇大號渙揚驟致鈞
衡之次恩踰始望理合終辭竊窺賜詔之溫彌覺危衷
之惕臣某中謝臣聞國以弼亮為重古以疇咨為艱立

賢無方選衆而舉若伊暨傳遠求耕築之中惟召與周
近取弟兄之內自時厥後未見可觀率因望實以推揚
罕繫班聯之高下洪惟聖世迴掩前聞肇分佐貳之官
並置東西之府既熟觀其品識復詳試以事為或揆席
之偶虛繫宸旒之獨斷多由德進間以次升上允合於
天心下亦孚於士論方之歷代最曰良規臣以迂愚幸
於際遇出入承明者踰二紀周旋兩社者幾八年以陞
下聽德惟聰豈不察臣之尊主庇民之學以陞下知人

則哲豈不鑒臣非助天理物之才特緣備使於機庭獲
俾序遷於宰路寵雖至矣臣實懼焉伏望皇帝陛下深
軫睿思恪遵家法不輕命相惟務掄材況元輔處中足
副仰成之意而舊人在外適當圖任之時徐觀奮庸亟
許遷令如此則計資顯授已彰徧愛之仁引分聽辭又
徇知難之義茲為兩得必契羣情臣無任云云

奉御寶
批降批

答不
允

批答 李燾撰

省表具之樞極之任統幹萬兵鈞衡之司摠揆庶事
夙均列於政地茲進登於宰庭所以疇具成勞昭我
隆眷矧文武萬邦之憲允謂全才而夙夜宵命之基
迄臻美業爰擢升於右弼用誕告於外朝所宜即副
巖瞻共熙庶績何異章之疊上乃渙號之久留且機
務至繁要使一日二日而無曠今謙辭已過豈勞再
命三命而益恭其若予言亟祇乃服所辭宜不允

第二辭表

臣某言伏蒙聖慈以臣上表再辭免新授右丞相恩命特降中使賜臣批荅不允者麻恭初宣敬上懇還之奏詔函疊下欽聆趣拜之言矧未副於汝諧顧敢忘於頻與臣某中謝臣竊以宰庭當否國勢重輕四海皇皇旦居中而枕奠萬幾業業臯在右而績凝後暨漢唐之朝雖慚帝王之輔然猶蕭曹同心而鴻業定房杜相濟而泰階平矧逢大有為之時難用小有才之佐臣之不肖衆所共知櫟楠非棟梁之材瓶罌非鼎鼐之器叨蒙睿

獎久綴近司趨事赴功已愆於筋力立綱陳紀有乏於
智謀固嘗面乞於守邊何當自期於當軸倏膺選任殊
駿聽聞諸大夫皆曰賢尚當採國人之論一男子即得
相寧不遺使者之羞倘昧牢辭將干大戾伏望皇帝陛
下如堯之咨四岳如舜之命九官與其因績用弗成始
從易置孰若及賢和相遜即賜允俞下可遂於身謀上
亦全於國體瀆尊之譴伏地以須臣無任云云

奉御寶
批降批

答不允仍
斷來章

批答 李獻撰

省表具之卿以高明醇正之資貫通今古懷誠秉節
表勵庶工自長西樞宣勞滋久乃進登鼎席弼予一
人朕志已定人望已孚而抗章三至懇辭彌確且在
漢制太尉相尊等耳今宥密領使蓋太尉之任則揆
路之進抑何辭焉卿其協圖政理同緝化機迄有殊
功是為美報謙遜之節固所嘉嘆而非所期望於卿
也其止奏封勿復來上所辭宜不允仍斷來章

謝表

臣某言伏奉制命授臣光祿大夫右丞相加食邑一千戶食實封四百戶累具辭免伏蒙聖慈特降中使賜臣批荅不允仍斷來章者聖主選賢久茲委印愚臣該輔忽爾揚庭懇避無從欽承有覲臣某中謝臣伏以虞書二典若都若俞說命三篇或啟或沃惟言聽計從而罔間則道同志合而愈光若乃元首既明而股肱非其良巨川將濟而舟楫違於用是謂君唱而臣莫應上行而

下弗隨此舜帝所以博詢於惠疇而商宗所以遠求於
審象伊昔攸重厥今敢輕恭惟皇帝陛下躬上聖之資
纂中興之緒有

缺

萬世之志有奄旬八荒之心當得

異才共陪休運而臣性迂識暗意廣術踈使之抱槩懷
鈞尚容強勉試以處中當軸豈所堪任簡擢誤加見聞
交駭雖布告已難於反汗而兢危殆甚於臨淵將何以
仰副延登下酬責望臣敢不圖惟薄效跂慕前脩庶績
咸熙深念允釐之義一夫不獲常懷愧恥之思冀竭涓

埃少裨海嶽臣無任

謝太上帝表

臣某言伏奉制命授臣光祿大夫右丞相加食邑一千戶食實封四百戶有常立武久陪帷幄之中應變守文躡進廟堂之上顧籌前之曠職恐歇後之貽譏臣某中謝臣竊考中興以來號為多士之際作成有道任使無遺宏材既顯於當時後覺復貽於今日如臣不肖被遇有初自忝綴於下科即召居於左學旋由麟省分察烏

臺蒙拔擢之殊恩勵公忠之素守逮受知於聖主滋竊
位於要津揚歷禁途周旋政地龍韜豹略已叨兵柄之
持鳳閣鸞臺更冒國均之秉莫容遜避徒劇凌兢茲蓋
伏遇尊號太上皇帝陛下德冠百王仁涵萬國巍巍蕩
蕩雖勛業之弗居濟濟翔翔猶賢能之在念是容蹇淺
亦玷弼諧臣敢不勉殫千慮之愚圖報兩宮之造舉十
六相舜功知廣於堯心為八千秋椿壽願符於莊頌臣
無任

辭免兼職劄子

臣準省劄二月二十二日奉聖旨差臣提舉國史院提
舉編修國朝會要所提舉勅令所寵靈參集恐懼交深
臣竊以筆削二書該古今之德業討論三尺垂中外之
章程苟非其人疇與斯事而臣最為冗陋積幸遭逢早
並英遊蓋婁窺於石室晚陪政路嘗同典於金科茲甫
踐於中台乃兼分於衆職自知忝冒人且譏訶仰冀聖
明俯垂簡照加大名而脩史特容李泌之辭定成法以

寧民專倚蕭何之講毋使提綱之任重為竊位之羞瀆
冒宸嚴臣無任云云取進止

不允詔

倪思撰

勅某云云具悉朕登崇弼臣摠領庶寮謀謨德業分
疇左右之賢典策章程兼攬古今之誼卿學該倫類
識貫本元茲奮庸於宰庭爰帥屬於史觀載統皇綱
之纂述仍提邦憲之刊脩職並萃於真儒望益孚於
衆雋自盼有命實振斯文觀故事而條便宜更酌方

今之要務先遠業而奏寬大尚恢一定之良規其略
謙辭以抒賢蘊所辭宜不允

因陳賈論王謙待罪劄子

五月

臣叨被恩擢之初輒循舊例荐引王謙豈謂弗協公議
致有論列在臣不能旁招俊乂仰誤召命無所逃刑昔
元祐宰臣因薦館職失當具奏自劾輒緣斯誼仰瀆聖
明亦不敢居家待罪以動觀聽伏望出自睿斷特賜貶
降少懲謬舉尚圖後效以贖前愆伏取進止

奉御批降
詔不允

不允詔 李獻撰

勅某云云具悉卿懋聞賢猷進持國秉甄收衆善總
理庶工比於輔相之初嘗有荐揚之奏志本期於得
士誼實見於首公雖由嘖室之言宜停促召然在宰
庭之任要務廣求固無可引之愆難徇所陳之懇即
承予意益奮厥庸所乞宜不允

夏旱乞罷政劄子

六月

臣仰惟陛下日勤政治昭格天心累載以來時和歲稔

自臣備位東府即致旱祥傳說之霖德裕之雨臣實有愧公言謂何況臣才輜望輕素乏相業雖微灾青自合黜幽伏望聖慈即賜罷免庶寬宸慮復見豐年伏取進

止

奉御筆批
降詔不允

不允詔

勅某云云具悉彌月以來常暘為沴並走羣望未格山川之靈敬共明神莫回天地之意朕側身思咎拊已興嗟皆由庶政之失中敢以青灾而移下卿等望

崇承弼忠輔國家方資益講於闕遺詎可輕圖於去就六事自責已愧成湯之謩三公免歸難循衰漢之典亟安厥位以邕遠猶所請宜不允

第二劄子

不曾付出

臣一介庸愚蒙陛下簡擢最早其於補報乃獨缺然自儀政途閱日滋久容容備位既無以仰裨聖圖又不能修明政刑究宣職業少副中外之望積為謬戾上千陰陽之和致茲旱災見於登用之始天意明甚人情可知

兼臣近者自劾謬舉蓋嘗面奏未敢因此決然引去只
俟一兩月間別伸懇請今緣閔雨歲事可虞上下啓啓
咎將誰執事既參會豈容復留伏望聖慈斷以不疑即
賜黜免應天以實關專在此干瀆宸扆臣無任戰灼俟
命之至伏取進止

乞罷政表

臣某言近以雨澤愆期乞賜罷免伏蒙聖慈特降詔書
不允者君德方隆宜多樂歲相才弗肅乃若常暘抗章

恭俟於嚴誅賜報尚循於曩典敢避瀆尊之譴荐陳引咎之詞臣其中謝臣聞古有三公今為四輔實任變調之責匪資期會之勞若登庸皆得其人則嘉瑞必為之應唯時盛夏久渴甘霖寧丁我躬上聖屢勤於精禱焉用彼相微臣難逭於常刑伏望皇帝陛下仰測天心俯稽朝論勿以前日詔除之誤而忘異時策免之規別求英猷協贊邦治三時不害消旱災於頃刻之間九叙惟歌洽和氣於堪輿之內臣無任

不允詔

勅某云云具悉朕臨御以來惟民是念顧九夏亢陽
之沴歷日彌長撫一時咎證之深遇災而懼天地弗
臨於請禱神明莫監於精誠惟歲事以堪憂當夜分
而屢嘆卿夙由公望服在台庭覩茲膏澤之愆荐控
免章之懇一人有過豈宜移置於大臣九叙惟歌所
冀力行於善政亟其反室毋或贅言所請宜不允不
得再有陳請

再同王丞相黃參政乞貶降劄子

臣等輔政無狀致茲旱災上無以寬九重之焦勞下無以弭百姓之咨怨連章請罪恭候汰斥豈謂陛下海涵天覆曲示眷留慙懼兢惶進退維谷伏見仁宗皇帝慶歷七年嘗因久旱特從宰執陳執中宋庠丁度降官之請載在國史為後世法今陛下縱未許臣等同時遽去欲乞稽用舊章並加貶降不惟默當天意抑可少塞人言伏取進止

奉御批旱暵為虐晨夕是憂弭災方賴於嘉謨貶降難遵於故事毋勤爾請用副朕

懷

再乞罷政劄子

臣伏見夏秋以來旱勢日甚陛下齋心祈禱靡神不宗
凡可以施惠恤刑求言損已無所不用其至宜乎順氣
協應沛為膏澤然雲方合而復散雨欲下而還止禾稼
就稿井泉將竭變異如此殆必有由非臣輔政無狀陰
陽弗和之明驗歟前月二十一日嘗具奏旱災見於微
臣登用之始天意明甚蓋為是也今既再旬人情愈覺

煎熬咎實在臣何所逃罪伏望陛下特施威斷亟賜罷斥庶幾人心悅而時雨降不至專勞聖慮抑可少塞公言干犯威尊臣無任戰栗俟命之至伏取進止

辭免生日牲餼劄子

臣伏見連月以來雨未時若苗稼就槁羣情嗷嗷陛下禹湯罪已至損內饗之常膳臣輔政無狀方俟嚴誅竊恐有司以臣日近初生例頒牲餼夫常袞辭賜饌於無事之際而微臣拜臺饋於貶食之時於義難安豈容饗

餐伏望聖慈特蠲常禮俾道空餐仍加絀削以塞灾咎
干瀆宸嚴無任戰汗之至取進止

奉御筆批
依所乞

同王丞相黃參政乞減俸劄子

臣等伏見皇帝陛下以時雨愆期憂勤備至減膳徹樂
聖心焦勞臣等變調無術致此灾沴陛下縱未欲並行
罷免猶當貶秩以懲失職前既控請未蒙賜允今復再
旬旱勢轉甚夙夜震懼益不遑寧倘陛下尚俾自詭後
圖且乞將臣等月俸餐錢並從減半支給庶幾薄示警

戒以弭天灾迄用有年未必不由於此伏取進止七月十四

奉御筆批
依所乞

辭免復俸劄子

臣猥以匪才過尸榮祿伐檀之刺每愧於中比緣旱灾
乞減半俸今方踰月未贖前愆詎意洪私亟令仍舊戴
恩深重省已兢皇方與攸司協圖荒政民無艱食乃敢
復常願俟來春欽承聖意臣無任惶懼俟命之至伏取
進止

不允詔 李獻撰

勅某云云具悉時會亢陽憂形巖廟嘗覽勞謙之請
姑從減俸之誠曾靡踰期遽能銷咎繫彌縫之宣力
竟變理之召和且咸享天心久復膳羞之御而散無
友紀幸寬餽賜之調廼洎於茲俾還其舊何勤列奏
更俟來年若旱歲之作霖要共圖於潤澤馭羣臣而
曰祿顧敢後於弼諧其體深衷無煩多遜所辭宜不
允

賀東宮生辰劄子

某茲者恭值皇太子殿下誕序載臨仰惟福壽兼隆與
天同永而況兩宮交致慶禮是誠前代所稀某夙被恩
憐今復密依重潤雖不獲與僚案展拜於庭顧野芹致
敬安敢虛拘輒忘進越僭具別紙伏乞令慈俯賜矜恕
某下情無任頌禱慚懼之至